


NZAMBI KE MUDYUMVWIJIDI WA YÊYÈ MWINÈ

 Taatu wetu wa mu Dyulu, Dîyi kampanda dya kûdi Wêwè ndifwanyine kwikala ne mushinga kutamba bidi bantu bônso bafwanyine kwenza anyi kwamba mu dîbà kana dyônso, bwalu bantu mbindile bwa kuKumona Wêwè. Nenukudi tuKusakidila bwalu kudi bantu badi bindile ne myoyi izuka, bakeba bwa kumona cintu kampanda cyenzeka. Nenukudi bantu biikale ne nyoota ya cintu kampanda, ndondo mwikale ubiikila Ndondo, kudi ne cya kwikala Ndondo kampanda bwa kwandamuna ku diine dibiikila adi. Ke bwa cinyi tudi mwab'ewu diloolo edi, mbwalu cyôci aci civwa mu myoyi ya bambi aba, ne bantu aba, bwa kutusangisha bwa kuKulomba dyanyishiibwa ne mabeneshwa, biikale twitabuuja ne Wêwè newondope babeedi ne neusungile bajimine, ne neumweneshe Dîyi Dyebe.

² Nenukudi nyewu tuKulomba, Taatu wa mu Dyulu, bwa Wêwè kutukumbajilaku bwalu ebu bu mutudi baKutekemene Wêwè ne didipwekesha dyônso, ku diloolo ne ku diloolo dyônso. Enzaku bwa kwikale di—dipongoloka dya cimpompi dya Nyuma Mwîmpè, ne muntu ne muntu afomomijiibwe ku bintu bikwabo byônso bidi bimunyungulukile pa kuumusha Nzambi. Enzaku bwa kwikale lubila lukolâkôlàayi lwikale lupatukila munkaci mwa bantu aba, biikale ne nyoota ya Nzambi, mu mushindu wa ne nekwenzeke ditabuluja mu ditunga dijima emu ne ekeleeziya yônso ûlè patapata ne bantu, bangenzâmpèkâatù biikale badila myadi bwa Nzambi abafwe luse, ne—ne Nyuma Mwîmpè mwikale wondopa babeedi, wendesha bikalaba, ne ubiisha bafwe, ne ufila bintu ebi bitu bilayiibwe mu Dîyi Dyebe.

³ Lwâku, Mukalenge Yesu, ûujè mulayi Webe. Lwâku kutudi diloolo edi. Tudi biitabuuje ne Wêwè udi umweumwe awu makeelela, leelu, too ne kashidi, ne milayi Yebe kayena mwa kupangila nansha. Dyulu ne buloba byônso bibidi nebipangile kadi Dîyi Dyebe kadyakupangilaku to. Enzaku bwa cyumvwilu cyetu ciikale bwashi. Enzaku bwa Nyuma Mwîmpè alwe ne ashiye buloba cilâlâlâ. Enzaku bwa cyumvwilu cyetu ciikale bwashi kudi Nyuma ne bukole bya Nzambi diloolo edi, bwa Yêyè wamona mwa kumweneshila kutudi twêtù Mêyi Ende malaya. Bwalu tudi tubilomba mu Dîna dya Yesu. Amen.

⁴ Mpindyewu, diloolo edi, nwênù badi balondesha kubala, tubuululaayi Bible mu Mukanda Mwibidî wa Peetelo, biikale

tubangila ku mvense wa 15, anu bwa ne tupeteku mushindu kampana wa dyakula pa Mufundu ewu mu tusunsa tukese.

Kabidi nëndyènzèjè ne mwanyi mwònsò bwa paanyima paa lufu lwanyi nvamona mwa kwikala anu balame misangu yònsò maalu aa mu civulukilu.

Bwalu twètù katwena balonde bintu bikwatakaja ne budimu, myanu, patwakanumanyisha bukole ne dilwa bya Mukalenge Yesu Kilisto, kadi turwa bantemu baa badimwene baa udi mutambe bunene.

⁵ Ndi munange aci nanku ne: “bantemu baa badimwene.” Kaciyi mwanu kampana to. Twètù tudi bantemu baa bitudi twamba.

Bwalu Yèyè wàkapeta luumu ne butumbi kudi Nzambi Taatu, ne kwakalwa dīyī dya dikema kudiye difumina mu butumbi butambidile dyamba ne: Ewu m’Mwanaanyi munanga, udi unsankisha menemene.

Ne twètù twàkumvwa dīyī edi dyàkafūminà mu dyulu, patuwwa nende pa mukuna wa cijila.

Tudi kabidi ne dīyī dya ciprofeta ditambe kujaadikiibwa; dinudi mwa kwenza bimpè bwa nwènù kuditabaleela, bu bukènkè budi buteemà mu . . .mwaba wa mīdimà, too ne pa kabundubundu kaa dituku, ne paabanda mutooto wa nkeesha mu myoyi yenu:

Biikàle badyanjile kumanya bwalu ebu ne, ciprofeta nansha cimwe cya mu mifundu kacitu cifumine ku didyumvwijila dya muntu dya nkaayende nansha.

Bwalu ciprofeta kaciyakalwa mu bikondo bya kale ku diswa dya muntu nansha: kadi bantu baa cijila baa Nzambi mbavwa bààkulà pavwabo bàsàkiibwa kudi Nyuma Mwimpè.

⁶ Mukalenge anyishe asakidileku mabeneshi Ende ku dibala edi dya Dīyī Dyende. Mpindyewu, nēngàngatè eci bu cyena bwalu ne: *Nzambi Ke Mudyumvwijidi Wa Yèyè Mwinè.*

⁷ Tudi ne mwoyi mu dituku dya cibwejakaji. Tudi ne mwoyi mu dituku didi balume ne bakaji kabayi bamanye menemene cya dyenza nansha. Bintu byònsò, bidi—bidi bimweka anu bu ne ncimvundu. Bintu byònsò, mbimweke anu bu ne kudi mishindu yàbùngì menemene ya ditangila. Awu n’Sataana, ke udi wenza nanku awu.

⁸ Mpindyewu, Nzambi kēna mwa kulumbulwisha cisamba ne bwakane, mu mushindu mukumbanangane, anu kwikale cipiminu kampana cidi cikengela Yèyè kubalumbulwishaye naaci. Nanku Bible udi wamba ne Yèyè nealumbulwishile bantu bònsò ku Yesu Kilisto, ne Yesu Kilisto pende’s n’Dīyī. Mu Yone Munsantu, mu nshapita 1, m’Mwambe ne:

Ku cibangidilu kwakadi Dîyî, ne Dîyî dyakadi ne Nzambi, ne Dîyî dyakadi Nzambi.

Nenku Dîyî dyakandamuka mubidi, ne dyakasomba munkaci mwetu, . . .

⁹ Mpindyewu, cyônsò citudi leelu ewu ndimweneshiibwa dya byambiibwa Byende. Munda mwa Nzambi. . . Kumpalampala Yêyè kavwa nansha Nzambi to, Nzambi, tudi bafwanyine anu kuMubiikila ne “Wa Cyendeleele.” Yêyè kavwa Nzambi to, bwalu mwaku ewu *Nzambi* (mwaku wa mu Anglais) udi uswa kwamba ne “cintu cya dikuukwila” kadi paaku kakuvwa cintu nansha cimwe civwa mwa kuMukuukwila nansha. Pa nanku Yêyè uvwa Wa Cyendeleele, Mushimî mu—munene wa meeji ônsò. Nenku mu Mushimî wa meeji ônsò ewu kamuvwa nî nkapwshipwishi, nî nkasunsukila, nî nkantu nansha kamwe, bukênkè mwaba kampana, mutooto, ngondo, anyi nî ncinyi cikwabo nansha cimwe to. Nzambi, citudi bamanye twêtù ne n’Nzambi aci, Nyuma munene uvwa wa Cyendeleele awu (uvwa kacya kayiku mutwadije, kayiku mushiikile), Yêyè nguvwaku. Nenku munda Mwende muvwa byambiibwa: bivwa mbyambiibwa bya kwikala Nzambi, pashiishe byambiibwa Byende bya kwikala Taatu, byambiibwa bya kwikala Mwânâ, byambiibwa bya kwikala Musungidi, byambiibwa bya kwikala Mwondopi. Byambiibwa byônsò ebi bivwa munda Mwende. Nenku mpindyewu Yêyè. . . Bintu ebi bidî bisokolodiibwe kubangila piine apu bidi anu byambiibwa Byende bidi bimweneshiibwe.

¹⁰ Cîndî njinga kwamba, *byambiibwa* bivwa m’“meeji” Ende. Nenku di—*dîyî* kampana m’“meeji maakudiibwe mukana.” Nenku piine apu bivwa mu meeji Ende. Nenku paakambaYe ne: “Cikampanda ciikalèku,” ne cyôci cyakiikalaku. “Cikansanga ciikalèku,” ne cyôci cyakiikalaku.

¹¹ Nenku mpindyewu, vulukaayi ne, nwênù beena Kilisto aba nuvwa meeji Ende kumpala kwa dyulu ne buloba kwikalaku. Nenku nudi dimweneshiibwa dya meeji Ende. Kumpala kwa nansha mene dyulu ne buloba kwikalaku, nuvwa munda mwa Kilisto, (amen) munda mwa Nzambi ku cibangidilu. Aci ncidi cyenza, apu, nwamonu’s, bwa ne nwikale bantu Bende. Nenku cintu mu kaabujima kaaci n’Nzambi, Yêyè mwine, mwikale udivwija Yêyè mwine cintu cya mubidi cidibo mwa kulenga bwa Yêyè wamona mwa kulengiibwa ne byanza, kumweneka, ne—ne bikwabo. Nenku ke cidi Nzambi aci, cintu mu kaabujima kaaci.

¹² Nenku bantu batu bamba ne: “Dyumvwija. . .” Kî nkwanji kupita matuku âbûngî âmvwâ ngakula mwab’ewu mu disangisha kampana, ke muntu mukwabo kungambila, wamba ne: “Mwaneetu Branham, wêwè udi ne dyumvwija dibi. Kwêna uumvwija Cyôci aci mu cyôci to.”

¹³ Mpindyewu, tutu tuumvwa. . .Bayaaya kudi ba-Méthodistes, bamba ne: “Ba-Baptistes kabeena bumvwija mu

byôbì to.” Ke ba-Baptistes paabo ne: “Beena Mpenta kabeena bumvwija mu byôbì to.” Mwena Mpenta pende ne: “Beena—Ba-Unitariens kabeena bumvwija mu byôbì to.” Unitarien pende ne: “Beena Assemblées kabeena bumvwija mu byôbì to.” Nenku muntu ne muntu udi anu wamba mukwende mudiye kayi uumvwija mu byôbì.

¹⁴ Nzambi Ke Mudyumvwijidi wa Yêyè mwine! Yêyè katu bwalu ne muntu nansha yêyè nganyi bwa aMuumvwijile nansha. Udi udyenzela Yêyè mwine dyumvwija Dyende. Mmuntu kaayi udi mwa kuumvwija Nzambi? Nzambi m’MuDyumvwijidi wa Yêyè mwine.

¹⁵ Mpindyewu, padi Peetelo wakula mwaba ewu, tudi tujandula ne ku cibangidilu paakamba Nzambi ne: “Bukênkè bwikalèku,” ne bukênkè kwikalaku, ke dyumvwija adi dya cyôcì aci. Pavwa Nzambi wamba cintu kampanda ne cyôcì cimweneshiibwa, nenku aci ke dyumvwija dya Nzambi ne Dìyì Dyende ndilelela. Nwamonu anyi? PaakambaYe ne: “Bukênkè bwikalèku,” aci civwa cyanji kwikala dyambedi mu meeji Ende kumpala kwa cintu bu ne mbukênkè kwikalaku. PaakambaYe ne: “Bukênkè bwikalèku,” bukênkè kubwayikabu mu maulu, ke dyumvwija ndyadi. Kabyena bikengela bwa muntu nansha umwe uumvwije ciine aci to, bwalu Nzambi wakamba nanku ne cyôcì cyakiikalaku. Padi Nzambi wakula ne cintu ciine cimweneshiibwa, ke dyumvwija dya Dìyì Dyende ndyôdì adi. Mbwa cinyi bantu kabeenaku mwa kumona ciine aci? Mbwa cinyi bantu kabeenaku bamona ciine aci?

¹⁶ Padi Nzambi wenza mulayi ne Nzambi wamba ne. . . Ku—ku cibangidilu, mu Genese, Yêyè wakaabanyina cikondo ne cikondo Dìyì Dyende bu muvwaDi mwa kwenda kubangila ku cibangidilu too ne ku ndekeelu. Nenku, pakaavwa biine bikondo ebi byenda biya, ke bukwaèkèleeziyà kubwejakajangana bintu byônsò ebi ku bilele, ne bikwabo, nenku Nzambi pende utu anu, kubangila ku Dipungila Dikulukulu too ne ku Dipyadipya, utuma bapofeta mu cyalu! Ne Dìyì dya Mukalenge diine kudi mupofeta nkutudi dilwa. Ne Dyôdì ditu dyenza cyôcì aci bishi? Ditu dimwenesha Dìyì dya Nzambi. Dimweneshiibwa dya Nzambi, didi dyamba ne mbulela anyi mmashimi. Kabyena bikengela bwa muntu nansha umwe uumvwije Cyôcì aci nansha, Dìyì didi didyumvwija Dyôdì diine. Nzambi ngutu mucilaye ne ncyôcì aci cyenzeka!

¹⁷ Bidi ne dikwacisha kaayi bwa kwamba nê ncinyi nê ncinyi cikwabo pa bidi bitangila Dìyì adi? Nngènzàmpèkààtù kaayi udi mufwanyine kuteeta bwa kwamba ne dyumvwija adi ndya mafi (padi Nzambi mufile mulayi ne Nzambi mwikale uwenza)? Awu n’Nzambi Yêyè mwine mwikale uDyenzela dyumvwija Dyende, uumvwija. Yêyè katu ukengela bwa muntu kuMuumvwijaye nansha, Yêyè ngutu udyumvwijila Yêyè mwine pa kumwenesha cyakalayaYe ne Neénzè.

18 Kaa, bu ekeleeziya mwa kumonaku ciine aci ne kumona milayi idi myabanya bwa cikondo cyônsò's we! Bikondo bikwabo byônsò, (nansha mu bikondo byônsò mwandamutekete bya ekeleeziya) Nzambi utu mutume mu cyalu ne mumweneshe bintu byônsò bivwa Nzambi mulaye bwa kwenza. Bintu byônsò, kî nkushaale cintu nansha cimwe cidi kaciyi cyenjiibwe nansha. Anu mu byôbì menemene! Cyakamba Ye ne Neénzè, mMucyènzè.

19 Bwalu Nzambi paakambaye, kale wawa mu Yeshaayi, paakambaYe ne: "Nsongakaji virgo neimite difu," wakiimita. Mpindyewu, nganyi—nganyi udi mwa kuumvwija ciine aci? Nzambi's ngwâkenza dyumvwija adi. Wakamba ne: "Nsongakaji virgo neimite difu," wakiimita. Mpindyewu, ncinyi ciwikala . . . wêwè kwêna mwa . . . Kakwena cintu nansha cimwe cidi mwa kwambiiibwa pa bwalu abu nansha, bwalu Nzambi wakamba ne neimite ne yêyè wakiimuta. Kadi ekeleeziya uvwa mutambe kufofoma cikondo aci bwa kumona cyôci aci. Nwamonu's, bavwa ne wabo mmwenenu pa cyôci aci. Civwa citambe—citambe kushiilangana ne civwabo bôbò batekemene.

20 Peetelo mwab'ewu uvwa mupingaje meeji paanyima, wamba ne: "Nzambi wakamwenesha Kilisto ku Dîyî Dyende, Wakamba ne: 'Ewu m'Mwanaanyi Munanga.'" Beena kwitabuuja aba bavwa biimane mwab'awu. Ne Kilisto nguvwa dimweneshiibwa dya Nzambi. Yêyè wakamwenesha Kilisto misangu yônsò ku Dîyî Dyende, bwalu Kilisto n'Dîyî. Yêyè utu anu umwenesha.

21 PaakambaYe ne . . . Mu matuku a Noa, Kilisto uvwa munda mwa Noa. Nudi nwiitabuuja nanku anyi? Noa wakamba ne: "Mvula nealoke. Nekwikale mvula, buloba nebututudiibwe." Mvula's wakaloka. Aci kacyakakengela dyumvwija kampanda to. Mvula wakaloka bwalu Nzambi, munda mwa Noa, wakamba ne: "Mvula nealoke." Yêyè uvwa muprofeta, nenku cileeji civwa ne cyakambaye cyakenzeka. Pa nanku bôbò kabeena ne bwalu bwa kucyumvwija nansha.

22 Bamwe baa kudibo, eku ne eku, bavwa mwa kwikala bambe ne: "Muntu ewu kî mmumanye bidiye wamba nansha."

23 Kadi Nzambi Yêyè ukaavwa anu mulayelaye ne: "Kwôkò kwikale muntu munkaci mwenu mwikale wa nyuma, anyi muprofeta, ne cidiye wamba cyenzeka, nanku nuciteelejaayi." Mmwômò, bwalu ncilelela. Bidi ne cya kupetangana ne Dîyî. Ne Noa pende uvwa upentangana ne Dîyî. Paakambaye ciprofeta ne mvula nealoke, mvula's wakaloka. Kabyakakengela dyumvwija kampanda bwa cyôci aci nansha, bwalu cyakenza anu cyôci aci.

24 Yeshaayi wakamba ne: "Nsongakaji virgo neimite difu," wakiimita. Mpindyewu, aci's civwa cya pa bwaci mu mushindu mukôle be. Bwalu, monaayi, mpaanyima paa bidimu nkama yâbûngî paakalwa mwine nsongakaji virgo ewu kwimitaye.

25 Civwa cya pa bwaci mu mushindu wa ne muntu mwakane dînà dyende Yozefu, bayende, "mwikale muntu wa maalu

malulame ne kayi muswe bwa kumunyangila luumu kumpala kwa bantu bônso. . .” Mwine muntu mwakane awu mu matuku awu, mushindu uvwabi ne cya kwikala byenzekele Yozefu pavwaye mubangile Mariya, mumusele.

²⁶ Uvwa musediiibwe. Mu matuku awu, kukosa cyôci aci, bivwa anu mwomumwe ne kwenda kwa masandi. Nenku, mu bushuwa bwa bwalu, bwa Yozefu yêyè, bivwa bimweneke anu bu ne Mariya uvwa ukeba bwa kumwangata bu cintu civwa mwa kumujika, anyi kumuvwija bwa ikale ngabu bwa cilema cyende yêyè, bwalu apa’s nyêyè ewu ukaavwa musanganyiibwe ne difu, pende kanji kubwela mu dibaka to, mwikale anu mubangila cyanaana. Diyele dya mushindu bu nanku awu, s’bivwa bya bamwasa mabwe bamushipa; ke civwa ne cya kwikala cyenzeke, bilondeshile Mikenji.

²⁷ Nenku Yozefu, bayende, uvwa muntu wa maalu malulame, muntu wa maalu malulame wa dikema. Uvwa mwitabuue Nzambi. Nenku pavwaye mwa kumutangila ne mèsù ende manene, mîmpè ne a lutuulu awu, mwikale wamba ne: “Yozefu, Mwarkanjelo Ngabudyele’s ngudi mulwe kummwenekela kadi kungambila ne nêngimîtè difu, nciyi mumanyanganeku ne mulume nansha umwe to.”

²⁸ Mpindyewu, bu Yozefu pende mwalujeku mèsù paanyima mutangile mu Mufundu awu, muprofeta’s ukaavwa mwambe ne neenzè cyôci aci! Civwa anu n’Nzambi mwikale uumvwija Dîyi Dyende Yêyè mwine! Nwamonu anyi? Kadi civwa citambe kwikala cya pa bwaci be.

²⁹ Ke lutatu lutu kwökò mu cikondo cyônso. Dîyi dya Nzambi ditu dyenyi kudi bantu; nDitambe kwikala dya pa bwadi be. Nzambi utu misangu yônso wenza anu bintu bya pa bwabi. Bitu anu bya pa bwabi kônso kutu Nzambi usanganyiibwa. Ditu dibengangana ne ndongolwelu ya pa buloba, bwalu batu ne bintu mu mushindu utubo bacinka bôbò ne ke mudibi ne cya kwikala. Kadi Nzambi ubwelamu kadi kwenza Yêyè cya pa bwaci.

³⁰ “Nsongakaji virgo ewu wafiki ku diimita difu bishi’s?” Yêyè uvwa muntu wa meeji matooke, ke kubangaye kukeba Nzambi pa bwine bwalu abu.

³¹ Nenku ke Nzambi kwakula nende mu ciloota, kumwambila ne: “Yozefu, mwânà wa Davidi, kuciinyi bwa kwangata Mariya mukajeebe kwebe to, bwalu cidiye mwimite munda mwende aci n’cya kudi Nyuma Mwîmpè. Nzambi ngudi mumubwikile mundidimbi Wende. Ke cidi cyenze bwalu abu nyaci.”

³² Nukaadiku bamone mwakayiikila Nzambi ne Yozefu mwab’awu? Mu mushindu mulondele, mu mushindu wa ciloota. Mpindyewu, tudi bamanye ne biloota bituku, tutu twitabuuja biloota. Mêmè ntu ngitabuuja biloota. Bikaadi. . . Nzambi ukaadiku misangu yônso muyiikileyiikile ne bantu

mu biloota. Kadi biloota mmushindu mulondele, nuumvu's, ncifwanyine kwikala cya bushuwa anyi cya mafi, amba anu bôbô bacyûmvwije. Kadi kabyakamukengela dyumvwija kampanda nansha. Nzambi Yèyè Mwine ngwâkaakula ne Yozefu buludi, bu muvwaku kakuyi muprofeta pa buloba mu matuku miine awu bwa kuumvwijaye to. Kukaavwa kakuyi muprofeta munda mwa bidimu nkama inaayi. Pa nanku, dilabula divwa ditambe bwîmpè divwa dilondele dya bwena dyakeelela Nzambi meeji bwa disanka, bwa mwana Wende Sungasunga wa balume, civwa nkwakula ne Yozefu mu ciloota kabiyi bya dyumvwija to. KwambaYe ne: "Mukaji awu udi wambilamu. Cintu cya Cijila cidiyè mwimite munda mwende aci m'Wânâ wa balume wa Nzambi." Kabyakakengela dyumvwija nansha.

³³ Nzambi utu ufila dyumvwija Dyende Yèyè mwine kudi bantu baa myoyi ya kweyemena, ya meeji matooke, balume ne bakaji badi batangila ci—cintu cidì kaciyi cyumvwika, wêwè mwikale wa kweyemena ne meeji matooke ne muswe kwitabuuja, Nzambi udi ne mushindu kampanda wa kuumvwijaci. Dyembedi, keba bwa kumanya ne mmulayi anyi. Bu nansha Yozefu mwalukileku paanyima ne museemene kule ne bilele ne mwalukile ku Bible, ne mukebe bwa kumanya, Yeshaayi's ukaavwa mwambe ne yèyè neenzè cyôci aci.

³⁴ Nenu maalu avwa mambiibwe, ne dilediibwa Dyende, ne byônsô bivwa bitangila bwalu abu's bivwa byambiibwe kudi Mifundu, "kudi baprofeta baa cijila," mwakamba Peetelo. Nenu muntu nansha umwe kêna ne bukenji bwa kudyzendela dyumvwija dya nkaayende pa bwalu abu to. Anu menemene cidì Nzambi mwambe ne neczyenzeke. Yèyè uvwa dimweneshiibwa dya Dîyì dya Nzambi dilaya bwa dituku adi. Nzambi ke wâkacyâmba, nenu's ke cyôci aci. Aci's cyakamana bwalu.

³⁵ Yesu wakamba . . . PavwaYe pa buloba, pavwabo kabayi mwa kuumvwa mudimu Wende wa bwambi, uvwa munene muye ne mwa naka, wa dikema ne dyanyina, (bôbô kabavwaku mwa kuumvwa to), wa dikema ne dyanyina, nanku's we. Kabavwa mwa kuMuumvwaku to. Wakamba ne: "Kenketaayi Mifundu!" (Ndi ntekemena ne ncyêna munkaci mwa kunupanda maci kunudi aku to, bu mûndi ntaayikila mwa cilumyana aci.) "Kenketaayi Mifundu, bwalu mu Yôyi amu mmunudi nucinka ne nudi ne Mwoyi wa Cyendelele, kadi Yôyi ayi's nyidi imfidila Mêmè bujaadiki." Nwamonu anyi? "Yôyi ayi's nyidi inwambila ne Mêmè ewu Ndi Nganyi."

³⁶ Nwamonu's, Nzambi mmwabanye Dîyì mu bitupa. Dituku adi ndivwa ne cya kwikala dya dimweneshiibwa dya Nzambi, Nzambi neetu (Emmanuel): "Dînâ Dyende nedibiikidiibwe ne Mukemeshanganyi, Mufidi wa Lungenyi, Mfumu wa Ditalala, Nzambi wa Bukole, Taatu wa Kashidi. Nenu Dînâ Dyende nedibiikidiibwe ne *Emmanuel*, 'Nzambi neetu.'" Nzambi uvwa munda mwa Davidi. Nzambi uvwa munda mwa Môsà. Nzambi's!

Nyêyè Nzambi awu kuumukila anu kuntwadijilu too ne kundekeelu, udimwenesha Yêyè mwine bwa cikondo aci. Kadi bwa eci cikondo cyôci: “Nsongakaji virgo neimite difu ne nealele Mwânà wa balume, ne Yêyè awu neikale Nzambi neetu.”

³⁷ Mbwa cyôci aci bwakaMupoopelabo pa nkuruse, bwa ne Yêyè uvwa uDivwija Nzambi, kabidi ne bwa dishipa dya Nsabatu. Yêyè uvwa—Yêyè uvwa Nzambi kumutu kwa Nsabatu, ne Yêyè uvwa Nzambi. Ne Yêyè kavwa anu Muntu wetu wa patupu ewu anyi muprofeta wetu wa patupu ewu nansha (nansha mupwabi ne Yêyè uvwa Muntu anu wetu wa patupu ewu ne Muprofeta), kadi Yêyè uvwa Nzambi-Muprofeta. Ne Yêyè uvwa dikumbana dya Dîyì, anu menemene cyakamba Nzambi ne Yêyè neenzè. Wakamba ne: “Nganyi wa kunudi nwênù aba udi mwa kuMpiishaku bwa mpekaatu? Kenketaayi Mifundu! Mu Yôyi amu mmunudi nucinka ne nudi ne Mwoyi wa Cyendeleele, kadi Yôyi ayi’s nyidi imfidila Mémè bujaadiki.” Kadi bilele byabo, bavwa ne mwoyi mu kaabukênkè katondoke kaa cikondo cikwabo.

³⁸ Bu mûmvwà nyiisha kukaadi ndambu wa mbingu pa ne: “*Kwikala ne mwoyi mu bukênkè butondoke.*” Bukênkè butondoke bûtu “mâyì a bakishi,” muunya mwikale utuuta panshi walukila, nenku mmâyì a mafi. Nenku bukênkè bwônsò butondoke bwa mu cikondo cikwabo mbukênkè bwa mafi budi bwalukile. Bantu batu misangu yônsò bendela anu mu cintu kampana cyakenzeka kukaadi bidimu. Ba-Luthériens badi bendela mu bukênkè butondoke bwa Luther. Muunya wa Luther uvwa mwîmpè mu dyende dituku adi; wa Wesley uvwa mwîmpè mu dyende dituku adi; wa Beena Mpenta uvwa mwîmpè mu dyawu dituku adi. Twêtù tudi batungunuke twenda tubanda cibandilu, tudi ne mwoyi mu cikondo cikwabo! Tudi anu twenda tutungunuka, tutungunuka, katuyi mwa kwikala anu tutangila paanyima nansha.

³⁹ Patudi twêtù biine tusomba bajaalame mu bintu, twela meeji ne tudi bapete bintu byônsò bimana kutwenzela, tupeta bilele byetu bimana kutuswikila mu dibuki; ne byôbì abi bivwa bîmpè mu diine dituku adi, kadi twêtù’s tudi munkaci mwa kutentemuka! Kenketaayi Mifundu bwa numone cyakalayiibwa bwa leelu ewu, nenku netumanye ne tukaadi penyi, nenku netwikale mwa kwamba ne tudi biimanyine penyi.

⁴⁰ Luther; nudi bafwanyine kutangila mu Mifundu bwa kumona mu cikondo aci—aci cya Saadi, nudi mwa kumona menemene cyakalayiibwa. Tangilaayi numone ne mmubandi wa pa kabalumu wa mushindu kaayi wâkapâtuka, tangilaayi numone ne ncinyi cyakapatuka bwa kulwangana nende, menemene, “budimu bwa muntu,” dilongolola. Tangilaayi numone Wesley, ne bikwabo. Paakapwekaci kuya kabwela too ne mu cikondo cya Mpenta, kupwekaci e kupicila mu ciine cikondo aci, tangilaayi numone mudici cyenze lwendu lwaci. Tangilaayi Mifundu bwa

numone mwaba utukaadi. Ke bwa cinyi Yesu wakamba ne: “Kenketaayi Mifundu!”

⁴¹ Monaayi mwaba utukaadi! Mêmè ndi ngitabuuja ne tudi ku Dilwa dya Mwânà wa Nzambi mpindyewu ewu. Ndi ngitabuuja ne tudi ku cikondo cya pa—pa dîbà mene didiYe mufwanyine kumweneka leelu anyi maalaba. Mêmè ndi ngitabuuja ne cyôci aci ke cidi Mifundu yamba patooke, bwa ne tudi mu mêbà a ndekeelu a maalul malonda a buloba ebu. Ndi mwa kumona mudi maalul enda angata mmwenekelu. Monaayi Nsangilu wa Bisumbu bya maalul a Nzambi ewu mudiye munkaci mwa kûlombola ekeleeziya yônsò bwa kuyibweja munda mwende yêyè, mu cimanyinu cya nyama wa lwonji. Ne monaayi Bukalenge bwa cyena Loomo ne cidibu munkaci mwa dyenza, ne makwabo ônsò. Monaayi mudibo benda badisanga, bakangila Bukênkè ciibi, bapangisha Evanjeeliyo bwa kupitaye. Bantu bônso nebenzejiibwe anu bwa kwikala beena cyôci aci ne kwendela anu mu makênkè abo bôbò anyi kabiyi nanku kanwakwendakanaku to nansha kakese. Nwamonu’s, tudi ku cikondo cya kunshiikidilu. Kakucyena cintu cidi citushaadile kabidi to pa kuumusha anu kushaala bakwate Nzambi ne biitabuuje Dîyi Dyende. Dîyi ditu misangu yônsò anu dibinge.

⁴² Mu cikondo cya ekeleeziya wa Laodikiya, cyôci aci ke civwa cikondo cimwepele cya ekeleeziya, ku byônsò, muvwa Kilisto mwediibwe pambelu paa ekeleeziya. Uvwa usanganyiibwa pambelu, mwikale ukookola. Cyênzèki ncinganyi? Nsangilu wa Bukwântèndeleelelu ewu ke wîkala mwa kuMwela pambelu. Bible mmwambe ne Yêyè uvwa ne cya kwikala pambelu, s’ke padiYe apa. Cyôci aci nçikangile cinyi ciibi? Dîyi. Ne Yêyè’s ngudi Dîyi, Yêyè utu anu Dîyi misangu yônsò, ne Yêyè’s ucidi anu Dîyi diloolo edi! Yêyè ngudi Dîyi.

⁴³ Bible mmwambe ne: “Dîyi nditwe, didi ne bukole kupita mwele wa nkânzà,” Ebelu, nshapita 4, “diikale dijingulula meeji ne mapangadika a mu mwoyi.” Ke civwa Dîyi! Bivwa bikengela kumanyabo ne Yêyè uvwa Nganyi pavwa Yesu wamba cyôci aci mu dituku diine adi.

⁴⁴ Tangilaayi numone cyakenzaYe. Dîngà dituku Yêyè uvwa mwimane mwab’awu, anu kuntwadijilu menemene kwa mudimu Wende wa bwambi. Kwakalwa muntu kampanda kudiYe, dînà dyende Simona, Simona Peetelo. Nenu Peetelo mmwenze anu uMutangila ne—ne uMumona, Yesu kumwambilaye ne: “Dînà dyebe n’Simona, ne udi mwânà wa Yona.” (S’bivwa bikengela kumanyaye ne Môsa ukaavwa mwambe ne: “Mukalenge Nzambi webe neajuule Muprofeta mufwanangane naanyi, ne Yêyè awu nguwikala ne cya kuteeleja.”) Nenu monaaku Muntu uvwa kacya baamulela kayiku mwanji kumumoma to, wamba ne: “Dînà dyebe n’Simona, ne udi mwânà wa Yona.” Mona’s, yêyè’s wakamanya anu pa cibanza ne aci civwa ne cya kwikala anu. . . Bôbò kabavwa bapete muprofeta to kukaavwa nkama

ya bidimu, kadi monaaku Muntu mwikale umwambila ne yêyè uvwa kampanda. Kabivwa bikemesha bu yêyè mwa kwakidila cyôcì aci nansha!

⁴⁵ Filipino, pa diine dîbà adi, kuyaye e—e kusangana Natanaela munshi mwa mucì, ke kwalukilaye nende kudi Yesu. Yesu ne: “Monaayi Mwena Izaleela udi munda kamuyi budimu.”

Ke yêyè ne: “Laabi, Wêwè wâmmanyi dîbà kaayi?”

⁴⁶ Yêyè ne: “Kumpala kwa Filipino kukubiikilaye, pauvwa munshi mwa mucì apu, Mêmè’s mvwa mukumone.”

⁴⁷ Yêyè ne: “Laabi, Wêwè udi Mwânà wa Nzambi! Wêwè udi Mfumu wa Izaleela.” Yêyè wakamanya ne bivwa nanku awu! Cinyi? Aci kacivwa cikengela dyumvwija kampanda nansha, Yehowa nguvwa mucyambe!

⁴⁸ Monaayi ne mwab’awu pavwa piimane bavwa kabayi biitabuuja cyôcì aci to. Ke bôbò ne: “Ewu Muntu’s m’Beezebula. Udi ne—Udi ne kaadijambu kaa mushindu kampanda kadiYe wenza. M—Mmwena lubuku, anyi cintu kampanda.”

⁴⁹ Yesu kubatangila, kwambaye ne: “Mona’s, ambaayi dîyi dibi adi bwa Mwânà wa muntu, nebanufwiledi luse. Kadi piikala Nyuma Mwîmpè mulwe bwa kwenza cintu cimwecimwe eci, kwamba dîyi dibi bwa Cyôcì aci, kabaadyakunufwilaci luse nansha kakese, nansha mu ebubuloba nansha mu buloba bulwalwa.” Uvwa munkaci mwa kwamba ciprofeta citangile dituku dyetu twêtù, dituku dituvwa twêtù aba ne cya kumona. Bwalu Yêyè udi umweumwe awu makeelela, leelu, too ne kashidi.

Nwavulukaaayi ne, Yesu Kilisto nguvwa munda mwa Mòsà.

⁵⁰ Yesu Kilisto nguvwa munda mwa Davidi. Pavwa Davidi, mwânà wa . . . Davidi kubandaye ku mukuna, mfumu mubengiibwe, ne kudilaye mwadi udila Yelushalema, kacivwa cîngà cintu to anu Kilisto munda mwende. Bwalu bidimu bitwe ku nkama mwandamukulu paanyima, Mwânà wa Davidi wakiimana pamutu paa Mukuna wa Oleva ne wakiinamija mèsù pa Yelushalema ne wakadila mwadi, wamba ne: “Wêwè Yelushalema, wêwè Yelushalema, mmisangu bûngi kaayi îndi Mêmè ewu mujingenge bwa kukubwikila mu mapwapwa mu mushindu utu nzoolo wa cikuka ubwikila twânà twende, kadi wêwè kwakaswa nansha!”

⁵¹ Pavwa Yozefu mu buloko, civwa n’Yesu. Paakamupaanabo ku bicyele bya mfranga bitwe ku makumi asatu, civwa n’Yesu. Paakamuvwijabo muntu wa Potifa, civwa n’Yesu. Paakasombaye ku dyabalume dya Pâlò. Ne pavwaye ujuuka, bantu bônso . . . mpungi uvwa udila, ne bantu bônso biikale benzejiibwe bwa kutwa cinù panshi, civwa n’Yesu. Muntu nansha umwe kavwa mwa kulwa kudi Pâlò kayi mupicile kudi—kudi Yozefu to; muntu

nansha umwe kèna mwa kulwa kudi Nzambi to, anu mupicile kudi Yesu. Civwa n'Yesu, Dîyi dyamba mu ciprofeta diikale dyûle, diikale dyamba mu mindidimbi ne mu bimfwanyi.

⁵² Pavwa Yesu pa buloba apa, Yêyè wakenza cintu cimwecimwe cyakenzabo kudi baprofeta, ke bwa cinyi baakamanya ne Yêyè uvwa dimweneshiibwa dya Nzambi dya Dîyi Dyende. Kacivwa cikengela kucyumvwijabo nansha.

⁵³ Paakamona Natanaela cyôci eci, wakapona panshi, wamba ne: “Wêwè udi Mfumu wa Izaleela, Mwânà wa Nzambi, Mfumu wa Izaleela. Tudi bakumanye Wêwè, muntu nansha umwe kèna mwa kwenza ebi to.”

⁵⁴ Nikodema kulwaye ciibufukubufuku, kwambaye anu cintu cimwecimwe aci bwa Bafaalesa. Kadi, nwamonu's, bôbô bavwa batambe kuswikakanangana mu Nsangilu wa Bukwântendeleelu mu mushindu wa ne kabavwa mwa kwitabuujuaku Cyôci aci to. Yêyè wakamba patooke civwa bôbô abu bamba, wamba ne: “Laabi, twêtù. . .” “Twêtù” ke nganyi mwine awu? Nsangilu wabo awu's! “Twêtù tudi bamanye ne Wêwè udi mulongeshi mufumine kudi Nzambi, bwalu muntu nansha umwepele kî mmufwanyine kwenza ebi bintu Nzambi kayi nende nansha.” Bavwa paabo bajingulule Cyôci aci, bavwa bamanye ne Civwaku, kadi bavwa batambe kuswikakanangana mu byôbi abi.

⁵⁵ Ne Nzambi pende, mu bidimu makumi anaayi byâpîci ebi, mmunyungishe ditunga edi ne dibatiiza dya Nyuma Mwîmpè, kadi balume ne bakaji bacidi anu pambelu paa Cyôci aci bwalu mbaswikakanangane mu cintu cimwecimwe aci, biikale ne mwoyi mu bukênkè butondoke bwa dituku dikwabo. Mbwalu kaayi bwine ebu's? Muntu yônsò mmuswe kwikala Méthodiste, Baptiste, Presbytérien, mwena Luther, anyi nê mmwena nganyi apa. Nwaminu's, mbukênkè butondoke.

⁵⁶ Bôbô abu bavwa ne mwoyi mu bukênkè butondoke bwa mu dituku dya Môsà. Yêyè wakamba cinyi? Wakamba. . . Baakamba ne: “Twêtù tudi bayiidi baa Môsà.”

⁵⁷ Yêyè ne: “Bu nwênù aba bamanye Môsà, nuvwa mwa kwikala bammanye Mêmè. Môsà wakafunda ungamba Mêmè!”

⁵⁸ Nwênù peenu bu ne nuvwa bamanye Luther, nuvwa mwa kumanya eci cikondo! Bu ne nuvwa bamanye ba-Méthodistes, nuvwa mwa kumanya eci cikondo! Bwalu Kilisto wakafunda wamba bwa eci cikondo! Méyì adi munkaci mwa kuula aa adi ne cya kuula mu eci cikondo. Kabyena bikengela bwa muntu kuumvwijaye Cyôci aci to, Nzambi ngudi udyenzela dyumvwija Dyende Yêyè mwine. Nzambi udi Udyumvwijila Yêyè Mwine, bwalu Yêyè ke Umwepele udi mwa kuumvwija Cyôci aci. Milayi ya Nzambi itu anu misangu yônsò ishindika cidîYe mwambe, ne cyôci aci ke dyumvwija mene.

⁵⁹ Mpindyewu, Yesu, (bwa kulaminyina dībà), Yesu wakamba, mu Yone Munsantu, mu nshapita wa 14, mvnse wa 12 ne: “Ewu udi uNgitabuuja, byenzedi bîndi Ngenza yêyè neàbyènzè pende.” NcyakambaYe anyi? Mmwômò. Kacyena cikengela dyumvwija nansha. Padi muntu kampanda wenza cyenzedi aci, n’Nzambi awu. Cya bushuwa!

⁶⁰ Wakamba kabidi mwômò amu ne: “Bu mwakadibi mu matuku a Lota, ke mwikalabi kabidi ku dilwa dya Mwânà wa muntu.” Yesu ngwâkacyâmba awu. Yêyè ngwâkacyâmba anyi? S’mbushuwa ne Yêyè ngwâkacyâmba! Aci kacyena cikengela dyumvwija to.

Bôbò badi bamba ne: “Ee, aci’s civwa ciswa kwamba ne. . .”

⁶¹ Civwa ciswa kwamba anu menemene cyakambaye Yêyè aci! “Bu mwakadibi mu matuku a Lota, ke mwikalabi kabidi ku dilwa dya Mwânà wa muntu.” Matuku miine a Lota avwa bishi? Twanjaayi kwalukilaku paanyima ndambu, bwa tujandule ne ncinyi civwabo benza.

⁶² Kuvwa bitupa bisatu bya bantu mu matuku a Lota: mwena kwitabuuja, mwena kwitabuuja wa budingibudingi, ne mwena bupidya. Aci cidi mu musumba ne musumba wônso ewu, cintu cimwecimwe eci.

Tudi tujandula ne Beena Sodoma ke bavwa mwena bupidya.

Lota ke uvwa mwena kwitabuuja wa budingibudingi.

⁶³ Abraham ke uvwa mwena kwitabuuja. Yêyè nguvwabo bashindikile cipungidi. Yêyè nguvwa mwindile mwânà mulaya. Yêyè nguvwa mumutekemene. Amen. (Ncyêna ngamba “amen” mwikale ndyambila nansha. *Amen* mbwena kwamba ne “Biikale nanku!”) Nenku mmwômò. Abraham kavwa mu Sodoma nansha. Abraham uvwa ku mutu wa mukuna ne pambelu paa Sodoma. Yêyè ngudi cimfwanyi cya Ekeleeziya wa nyuma leelu ewu.

⁶⁴ Lota yêyè udi cimfwanyi cya ekeleeziya wa cyena mangumba uciidi lwa mu cibanda mu Sodoma. Tangilaayi numone, Bible mmwambe ne: “Mpekaatu ya Sodoma ivwa itacisha musuuka wende mwakane awu ku dituku ne ku dituku.” Mbwa cinyi kavwa yêyè ne dikima dikumbane bwa kulwisha cyôci aci? Kudi bantu bîmpè bààbûngi basombe mu ekeleeziya leelu ewu, batangila pambelu bamona bakaji bavwale tuputulu ne balume biikale benza biine bintu ebi, ne beena disangisha dyabo biikale baya, bakanaya ndundu wa golf mu dyalumingu, benza masanka a didya dya pique-nique, ne manaya a dyowela mu mâyi ne bikwabo, pamutu paa kuyabo mu ekeleeziya. Bashaala basombe kumbelu diloolo dya mu diisâtù, biikale babandila télévion, pamutu paa kuyabo mu ekeleeziya. Bumvwa mwa kwamba cintu kampanda pa bwalu abu, kadi kasumbu kaa balombodi kafwanyine kubiipata. Mbwalu kaayi bwine ebu’s? Awu’s ke Lota cyakabidi, utangidila pa dididiishi dyende

umona mpekaatu pambelu, kadi uciina bwa kuteela “mpekaatu” mu dîna!

65 Abraham kavwa mu ciine cimvundu cyabo aci to, uvwa yêyê pambelu paa cyôci aci. Yêyê uvwa cimfwanyi cya Ekeleeziya wa nyuma. Mpindyewu tangilaayi numone cyakenzeka anu ku kunshiikidilu menemene, pabwîpi menemene ne kapya kulokaku. Ne bôbò bavwa bantu baa Bisamba bya Bende. Civwa cindidimbi cya kapya kiikala mwa kulokela bantu baa Bisamba bya Bende leelu ewu, piikala mamfumu ne cya kucibudiibwa ne kwoshiibwa. “Maulu neakwate kapya,” mudi Mukalenge wamba, “ne neoshike ne kapya kakole kaa kâlâkuka.” Civwa ncimfwanyi cya cyôci aci.

66 Mpindyewu tubazolaayi. Abraham nyêyê ewu apa mumane kwikadila pambelu, kayi mu Sodoma to, uvwa pambelu paa Sodoma. Lota yêyê ucivwa anu mu Sodoma.

67 Cintu cikole mwa kucyumvwa, civwa ne cya kwikala dinda kampanda dya luuya lukole, lwa pa dîbà dya dikumi ne dimwe, ke kumonaye bantu basatu benda balwa, bantu anu beetu baa patupu aba’s, benda bapweka ne njila, mu kajila. Abraham uvwa musombe munshi mwa mucu wa nsànga, mwikishe. Pamwapa, uvwa mupatuke ne cisumbu cya bimuna mu dinda adi, mwalukile, pabwîpi ne dîbà dya nkânkâlâ. Kumonaye bantu basatu benda balwa. Nenku kuvwa cintu kampanda pauvwa mwa kutangila biine bantu abu, cintu cya, ciikale cyamba bwalu’s. Ekelekele!

68 Kutu anu cintu kampanda misangu yônsò pa bidi bitangila Nzambi, padi Cyôci aci cifika munkaci mwa bantu, Ciikale cyamba bwalu. Bôbò mbamanye Cyôci aci. Kutu Cintu kampanda ciikale cibambila ne, kudi dishindikika kampanda mwab’awu.

69 Abraham kuvukuta lubilu, kwambaye ne: “Mukalenge wanyi, epukilaayi lwa kwanyi eku nkakebe kwôkò ndambu wa mâyi, nye kaàkeba bwa kunwowa ku makàsà, ne bwa nnupe cipese cya dyâmpà, nenku pashiishe nenumone mwa kukwata njila kuya kunuyaaya.” Ke yêyê kukudimuka. Kunyeemenaye mu cisumbu cya bimuna e kukwataye kânâ kaa gonombe ne kukashipaye, kwambilaye mwena mudimu bwa kukalongololaye. Kubwelaye mu ntenta, lwa kwinshi kwa mwaba uwayne awu, kwambilaye Sarah bwa yêyê kuvundakaja ndambu wa bukula, bwa kwenza ndambu wa, anyi ndambu wa bukula, kwenza dyâmpà, ne kwenza tûtô pa difuwa. Yêyê kupatuka naabi pambelu apu e kubateekelaye bwa kudyabo. Pavwaye musombe mwab’awu apu, munkaci mwa didya, bôbò kubanga kumona ne, Muntu ewu uvwa anu wenza watangija mêtù lwa kwinshi ku Sodoma kwaka. Ke Yêyê kwamba ne . . .

70 Babidi baabo, nwavulukaayi ne, baakapweka mu Sodoma. Babidi mbaakaya ku Sodoma. Bu nwênù mwa kuswa, bwalu

ebu kabunupicidi to. Ndi mêmè mutume meeji ku cyakamba Yesu. Babidi baabo baakaya ku Sodoma bwa kuya kapatula Lota ne bikaavwà bilongolola bwa kupatulabo muntwamu. Nenku babidi baakapwekamu abu, baakapwekamu ne baakayiisha. (Ne kuvwa Kampanda wâkashààla paanyima ne Abraham. Tangilayi numone cimanyinu cyakenzaYe.) Baakapeta cimanyinu lwa mu cibanda mwamwa, mwômò amu muvwa. . . Beena Sodoma bôbò kuvwijiibwa bampofo. Diyiisha dya Evanjeeliyo ditu misangu yônsò anu difofomija mwena bupidya. Nenku monaayi bîmpè civwa cyenze bwalu abu.

⁷¹ Mpindyewu, kudi Kampanda mushaale mwimane paanyima apa ne wâkenza cimanyinu kumpala kwa Abraham.

⁷² Mpindyewu, nukaadiku bamone bîmpè, mufundi wa maalu malonda nansha umwe, londeshaayi mu Mifundu, londeshaayi mu maalu malonda, kakutu kwanji kwikalaku musangu kampanda mu bikondo bya ekeleeziya ukaadiku muntu muye ku ekeleeziya ya mu mênà cyanaana idi pambelu pa buloba paapa, mwamwa mu mangumba, kakutu kwanji kwikala muntu ne dînà dijika ne h-a-m, bu Abraham, kwônsò eku to. Kadi leelu ewu mbapete umwepele, G-r-a-h-a-m. Mmwômò. Mwikale upweka muntwamu, ubabiikila bwa kupatukabo. Yêyè's udi wenza mudimu wa ukemesha ku cyôci aci. Graham, Billy Graham, musadidi wa Nzambi pambelu paapa munkaci mwa mangumba, mwa beena cidiidî, ne bakwabo, ukumangana naaci ne bisûsù.

⁷³ Dituku dikwabo pavwabo bakeba bwa yêyè kufila mpala bwa kumusungulabo bu Mfumu wa ditunga, wakabibenga kwosha ne munu mwîkù. Nzambi, wâmubèneshakù bwa cyôci aci. Mona's, byapu bya wîskî byabya, yêyè kavwa mwa kwelaku mene nansha cidya cimwe cyakumpala muvubi mwa kukengediibwa to. Bavwa mwa kwikala batuule binunu bya miliyô ya ndola, bwalu yêyè uvw'a kwikala mubikange nansha bya munyi nansha bya munyi, byapu bya mfwanka abi ne bintu bya mushindu awu. Nwamonu's, yêyè ngudi pambelu paapa bu musanjeela wa Nzambi mutumina Beena Sodoma. Ke mudibi menemene.

⁷⁴ Kadi vulukaayi ne, kuvwa Kampanda wâkashààla lwa ku mutu wa mukuna kwaka ne Abraham, Muntu mukwabo, pa kuumusha babidi baakapweka mu cibanda mwamwa benze bu batangadiki baa cyena leelu baakapweka mwômò amu bwa kuyiisha to. Tangilaayi bîmpè, kwakashaala Kampanda lwa ku mutu wa mukuna kwaka. Babidi baakapweka lwa *kwaka* naka, ne Umwepele kushaalye *apa* ne Abraham. Ne Yêyè wâkashààla ne Abraham awu wakamupa cimanyinu.

⁷⁵ Mpindyewu tangilaayi, dînà dyende kumpala kwônsò aku divwa "Abram" ne dya mukajende divwa "Sarai," dituku dimwe cyanaana anyi abidi kumpala kwa cyôci aci. Nzambi uvwa mumumwenekele mumwambile ne: "Ndi mpindyewu

nshintulula dînà dyebe dya Abram bwa kushaaladi Abraham.” (Nwamonu’s, G-r-a-h-a-m mmaleeta asambombo, muntu.) Kadi A-b-r-a-h-a-m udi ne mmwandamutekete, maleeta mwandamutekete; h-a-m, diikale dijika ne h-a-m.

⁷⁶ Mpindyewu, lwa ku mutu wa mukuna eku mu Ekeleeziya wa nyuma, kuvwa Umwepele lwa kwôkò aku muye kudi Abraham, nenku tangilaayi bîmpè cyakenzaYe. Wakamba ne: “Abraham,” (kayi “Abram” to) “Abraham, mukajeebe wêpi” (kayi “S-a-r-r-a” to) “S-a-r-a-h? Mukajeebe Sarah wêpi?”

⁷⁷ Tangilaayi numone cyakambaye: “Nyawu udi mu ntenta paanyima Peebe apu.”

⁷⁸ Ke Yêyè kwamba ne: “Nêndwe kukusamba. Nêndwe kukusamba.” Monaayi mupinganyi wà muntu awu, Yêyè awu, bilondeshile mulayi ukaawaYe mufile. Awu’s uvwa n’Nzambi! Yêyè ne: “Nêndwe kukusamba.”

⁷⁹ Nenku Sarah, (mu mushindu utudi twêtù bônso bafwanyine kuumvwa’s) kusekelaye mu dyâpà, mundamunda, wamba ne: “Mêmè ewu, mukaji mukulakaji, wa bidimu lukama, mukalenge wanyi” (ng’Abraham awu) “mukulakaji pende, bamane kupita cikondo cya mwoyi cya biine abi bu bansonga.” Yêyè ne: “Mona’s, twêtù biine katuciyi kabidi bafwanyine kwenza mananga bu nanku, mêmè mukulakaji ne yêyè pende mukulakaji.” Ke yêyè ne: “Katwenaku mwa kupeta aci to.” Ke yêyè ne: “Mushindu kaayi’s? Bintu ebi kabyena mwa kwenzekaku to!”

⁸⁰ Nenku mwine—mwine Muntu awu (Nzambi mu mubidi wa buntu) kwambaye ne: “Sarah waseki ne wêdi mpata bwa cinyi, wamba bintu bu nenku ewu?” Mu ntenta’s, paanyima Pende.

⁸¹ Mpindyewu tangilaayi numone, piikalaci kaciyi mudimu wa bwambi umweumwe uvwa nawu Yesu Kilisto awu! Yêyè’s uvwa utangija mèsù pa bateeleji kadi kumanya meeji avwabo beela. Wakambila Peetelo ne uvwa nganyi ne dya tatwende uvwa nganyi. Wakambila Natanaela.

⁸² Wakambila mukaji wa ku ciina cya mâyi, paakambaye. . . Yêyè ne: “Nda kaNgangacile mâyi a kunwa,” anyi ne: “Ntwadile mâyi a kunwa.”

⁸³ Yêyè ne : “Mukalenge, kacitu cilele bwa Wêwè ewu kuyiikilangana ne. . . bwa nwênù Beena Yuda kuyiikilangana ne Beena Samaaleya to. Katutu ne dipetangana pankaci peetu to.”

⁸⁴ Yêyè ne: “Kadi bu wêwè mumanye Mwine ûdi wakulangana nende ewu, wêwè’s ke uvw’a kundomba Mêmè mâyi a kunwa.” Muiyiki kutungunukawu. Yêyè ne: “Nda ukangate bayeebe kadi ulwe mwab’ewu.”

Yêyè ne: “Mêmè ncitu ne bayaanyi to.”

Yêyè ne: “Wambi bîmpè, bwalu ukaadi mubapete bataanu.”

Yêyè ne: “Mukalenge!”

⁸⁵ Tangilaayi dishiilangana pankaci paa cyôci aci ne ba—ne baakwidi abu baa dituku adi, nsangilu awu uvwa ne mwoyi mu bukênkè butondo ke bwa dituku dikwabo. Bôbô baakamba ne: “Ewu’s n’dyabulu!” Bivwa bikengela bwa kufilabo dyandamuna dya ku cintu kampanda kudi beena cisumbu cyabo, bwalu bivwa bikengela cyôci aci.

⁸⁶ Kadi cyakandamuna kakajaana aka kavwa kakwate ne bya luse, Diminu adi didyanjila kulongolola diikale diteeka mu mwoyi wende. . . Ukaavwa mumvwe bintakanyi abi bimwende ku mwoyi ne bimucyokeshe, mubange ne kupatuka mu mîsèèsù mushaale ndumba. Kadi mmwenge anu umona Cyôci aci, ke yêyè ne: “Mukalenge, ngamanyi ne Wêwè udi Muprofeta. Katwena bapete muprofeta to kukaadi bidimu nkama inaayi, kadi mbatwâmbile ne paalwa Maasiya ke bintu byenzaYe ebi.” Ekelekele! Dimiinu adi dikaavwâ diteekiibwe mwab’awu ke kutupikadi e kulwadi ne mwoyi! Bwa cinyi? Kadivwa dikengela dyumvwija nansha dimwe to.

⁸⁷ Yesu ne: “Yêyè awu’s ke Mêmè udi wakulangana neebe ewu.” Aci kacyakakengela dyumvwija nansha dimwe to. Wakenza cishima ne wakajaadika ne Yêyè ke uvwa Maasiya awu, amen, ulondelangana menemene byakadi Nzambi mulaye (“Mukalenge Nzambi webe neajuule Muprofeta mufwanangane naanyi,” mwakamba Môsà). Cívwa ncinyi? Dishindika dya Mufundu!

⁸⁸ Kuvukutaye lubilu e kubwela mu cimenga, wenda wamba ne: “Lwâyi, Numonaayi Muntu udi mungambile bintu bîndî mêmè ewu mwenze. Yêyè ewu kî n’Kilisto mwine anyi? Kî n’Yêyè ewu anyi? Mmunganbile bîndî mêmè ewu mwenze.”

⁸⁹ Mpindyewu tangilaayi bîmpè, Yesu, uvwa n’Yêyè awu kwaka mu Muntu awu uvwa mukome nyima ku ntenta ne mwambe bivwa Sarah wela meeji munda mwa ntenta amu.

⁹⁰ Dìyì dya Nzambi didi dyamba, mu Ebelu, nshapita 4, ne. . . Yêyè udi wamba nunku ewu: “Dìyì dya Nzambi didi ne bukole ne nditwe kupita mwele wa nkânzà, dikosa too ditapulula ne bwongo bwa mu mifuba, ne didi dijingulula meeji ne majinga a mu mwoyi.” N’Dìyì! Ne musangu wónsò uvwa muprofeta ulwa, uvwa ulwa ne Dìyì, ne yêyè ke uvwa Dìyì bwa cikondo aci. Nenku civwa cyenza cinyi? Mwambi wa ciprofeta mwikale ujingulula meeji avwa munda mwa mwoyi.

⁹¹ Dyôdi dyakenza nanku mu Yesu Kilisto bwalu Yêyè uvwa kaabujima kaa Dìyì.

⁹² Ne Yesu wakamba ne: “Bu mwakadibi mu matuku a Sodoma, ke mwikalabi mu dilwa dya Mwânà wa muntu.” Nyuma wa Nzambi uvwa ne cya kulwa pa buloba mu mmwenekelu wa bantu, Nzambi mumweneshiibwe mu mubidi wa buntu (Amen! Nudi numona aci anyi?), ne uvwa ne cya kwenza cintu cimwecimwe cyakenza Nzambi mu mubidi wa buntu ku Sodoma aci. Vulukaayi ne, bôbô abu bavwa mu dindila

dya mwânà mulaya. Ne, dyakamwe paanyima paa cyôci aci, mwânà mulaya wakalwa. Ke cyakadi cimanyinu cya ndekeelu cyakamonabo kudi Sodoma ne musumba wa Abraham kumpala kwa mwânà mulaya kufikaye. Nukaadiku bamone bîmpè cyôci aci anyi? Nunku mpindyewu Ekeleeziya wa nyuma wafiki pa dyôdi dîbà adi.

⁹³ Muntu mukwabo uvwa wamba ne: “Mwaneetu Branham, muwâmbi ne ‘uvwa n’Nzambi?’”

⁹⁴ Bible s’ngudi mwambe ne, Civwa n’Nzambi! Aci kacyna cikengela dyumvwija to. Yêyê’s udi Elohim. Ke mwakaMubiikila Abraham. Mubadi wetu yônsò wa Bible ewu’s mmumanye cyôci aci. *Elohim*, “Ewu udi mudikumbanyine mu byônsò.” Yêyê uvwa Wa Kumpala, Wa Ndekeelu; Ntwadijilu, Ndekeelu. Elohim! Abraham wakaMubiikila “Elohim.” Nzambi (ne maleeta manene mu cyena Ebelu), Elohim; anu bu ku cibangidilu ne: “Nzambi,” Elohim.

⁹⁵ Yêyê uvwa Elohim mumweneshiibwe mu mubidi wa buntu, muvwale bilamba bya bantu, udyà byakudya bya bantu. Amen! Cimanyinu cya ne mu matuku a kundekeelu Nzambi neamweneke cyakabidi munkaci mwa bantu Bende mu mubidi wa buntu! Amen! Yesu wakamba ne: “Byenzedi bîndi Mêmè ngenza, nenûbyênzè peenu. Ne bu mwakadibi mu matuku a Sodoma, ke mwikalabi ku dilwa dya Mwânà wa muntu.” Amen! Aci kacyna cikengela dyumvwija nansha; cidi cikengela dimweneshiibwa, ke cidici cikengela. Amen. Nudi nwitabuuja cyôci aci anyi?

Twinyikaayi mitu yetu panshi.

⁹⁶ Taatu wetu wa mu Dyulu, nyewu tuKupa mulayi Webe diloolo edi ne Wêwè ngwâkamba bintu ebi. Wêwè ngwâkabilaya. Kakwena muntu nansha umwe udi mwa kuvwija Diyî Dyebe ne mwoyi to pa kuumusha Wêwè. Wêwè wâkamba ne: “Bukênkè bwikalaku,” ne bukênkè bwakiikalaku. Muntu nansha umwe kêna ne cya kuumwija aci nansha, cyôci cyakamweneshiibwa.

⁹⁷ Anu bu mutwâtèedi Yeshaayi, muprofeta ne: “Nsongakaji virgo neimite difu,” yêyê kwimita; aci kacyna cikengela dimweneshiibwa kampana to, yêyê wakiimita. Ke cyakenzeka.

⁹⁸ Wêwè wâkamba ne, pavwaYe mwa kulwa Uvwa ne cya kulediibwa mu Betelehema ne: “Mu wêwè Betelehema ewu, Yudaaya. Wêwè kwêna mutambe bukesa ku bamfumu bônso baa Yuda, baa Izaleela anyi? Kadi mu wêwè ke mwapatukila Mukookeshi wa cisamba Cyanyi.”

⁹⁹ Bintu bivwaYe mwa kwenza, civwaYe mwa kwamba mu lubila ku nkuruse, muvwabo mwa kuMupiisha, kutubula makàsà Ende ne byanza Byende; “Yêyê wakatapiibwa mputa bwa kushipa kwetu kwa mikenji, ne wakazaajiibwa bwa bubu bwetu; dinyooka dya ditalala dyetu pambidi Pende; ku mibundabunda Yende twâkondopiibwa.”

¹⁰⁰ Mwakamba Davidi ne: “Ncyakulekela musuuka Wende mu mwaba wa bafwe, anyi ncyakwitaba bwa Wa Cijila Wanyi amone dibola nansha.” Nenu mu dituku diisâtù, kumpala kwa mēbà makumi mwandamutekete ne abidi kukumbanawu bwa kubolessa mubidi Wende, Dìyì dya Nzambi dikaavwa dyambe ne: “Yèyè neabiike ku lufu.” (Bòbò kwamba ne baakiiba mubidi Wende kuyabo nawu; ke cigidibo biitabuuja.) Kadi twētù, Mukalenge, tudi twitabuuja Dìyì Dyebe! Dyakamweneshiibwa. Yesu Kilisto wakabiika ne wakamba ne: “Nēng- . . . Monaayi, Ndi neenu misangu yōnsò, too ne kunshiikidilu kwa buloba.”

¹⁰¹ Tudi twitabuuja ne Wēwè udi mwab’ewu diloolo edi. Tudi twitabuuja ne Wēwè udi anu mwine Yesu Kilisto awu menemene diloolo edi, mwab’ewu, anu mūvwà Wēwè kacya kwōnsò aku. Kadi cyūdi Wēwè munkaci mwa dikeba cidi anu mmēsù, maboko, mikolo, mukana, misuuka, mibidi, byūdi mwa kukwata naabi mudimu bwa Wēwè kudimwenesha. Nzambi, utujidile diloolo edi, bwa twāpeta mwa kumona Yesu Kilisto udi ne mwoyi awu mwikale ne mwoyi munkaci mwetu. Anyisha alwe! Pashiishe byenzeke, bu mwakadi nzala ya Beena Gelika abu bāakalwà dituku adi, ne bāakambà ne: “Mukalenge, tudi tujinga kumona Yesu.” Nenu baakafika ku diMumona. Kaa, bōbò’s bavwa ne cya kwikala bapete disaluka paakaMutwishilabo mēsù’s!

¹⁰² Nzambi, Wēwè udi umweumwe awu leelu ewu. Ne Wēwè wākalaya ne twētù biikale ne nzala tudi mwa kuKumona. “Katanci kakese, baa pa buloba kabaakuMmona to” (mwena bupidya); “kadi nwēnù nenuMmone, bwalu Nēngikalè neenu, ne munda mwenu mene, too ne kunshiikidilu kwa buloba.” Tudi bamanye ne Wēwè udi umweumwe awu makeelela, leelu, too ne kashidi.

¹⁰³ Mukalenge, Mēyì mmambiibwe, mmafundiibwe, anyishāku enzeke mpindyewu, bwa Butumbi bwa Nzambi, bwa kuleeja ne Yèyè utu mulamate ku Dìyì Dyende. Amen. Nzambi anubeneshe.

¹⁰⁴ Nkaadi mbiikila mulongo wa babeedi. Ndi ngela meeji ne Billy wāmbi ne mmwabanye twarta twa disambila, kubangila ku umwe too ne ku lukama, anyi cintu cya bu nanku awu. Yèyè kēna mwab’ewu bwa mpindyewu ewu to. Kudi . . . Karta kaa disambila nomba . . . Muntu atangileku paanyima paa kende . . . Mbifwanyine—mbifwanyine kwikala nomba mwikale ne—ne dileeta (A, B, C, D, anyi . . .). Ncinyi, A? Mbimpè.

¹⁰⁵ Twangataayi A, nomba wa kumpala, mwibîdi, mwisatù, mwinâyì, mwitânù. Bangaayi anu kujuukila kuulu mushindu ewu. A, nomba wa kumpala, nomba mwibîdi, nomba mwisatù, nomba mwinâyì. Inaayi, cyēna mumumone mujuuke kuulu to. Karta kaa disambila nomba mwinâyì. Umwe, ibidi, isatu. Disambila . . . Pāmwāpa kēna ne mushindu wa kujuukaye kuulu to. Piikalaye kayi ne mushindu to, muntu atape dīsù ku karta

kaa mwena mutumba nende, udi mwa kwikala ne karta kadi kayi ne mushindu wa kujuukaye kuulu to. Lukasa lukasa mpindyewu. Nkôkò kaka, inaayi. Itaanu, karta kaa disambila nomba mwitânù. Mwisambombo, wa mwandamutekete, wa mwandamukulu, wa citeema, wa dikumi, wa dikumi ne umwe, wa dikumi ne mwibîdi. Bangaayi anu kuseemenena kuneeku mpindyewu padi nomba yenu biikale bayibiikila apu. Nomba wa kumpala, mwibîdi, mwisâtù, patukaayi nuvwile anu lwa eku nunku ewu. Karta kaa disambila nomba wa kumpala, mwibîdi, mwisâtù, mwinâyì, mwitânù, mwisambombo, mwandamutekete, mwandamukulu, citeema, dikumi, dikumi ne umwe, kwataayi anu myaba yenu. Dikumi ne umwe, dikumi ne mwibîdi, dikumi ne mwisâtù, dikumi ne mwinâyì, dikumi ne mwitânù, dikumi ne mwisambombo, dikumi ne mwandamutekete, dikumi ne mwandamukulu, dikumi ne citeema, makumi abidi, makumi abidi ne umwe, makumi abidi ne ibidi, makumi abidi ne isatu, makumi abidi ne inaayi, makumi abidi ne itaanu. Kudi muntu udi kayi ne mushindu wa . . .

¹⁰⁶ Ndi mmona nsongalume mu dikalu dya bikalaba lwa paanyima paapa naka. Nomba webe piikalaye mubiikidiibwe, wêwê mwanaanyi wa balume, ne—ne wêwê kuyi ne mushindu wa kujuuka . . . ee, lama anu cyanza cyebe muulu, twêtù ke baakeba mushindu wa wêwê kufika kuneeku. Umvu anyi?

¹⁰⁷ Mbantu bûngì kaayi mu mwab'ewu badi kabayi ne twarta twa disambila kadi biikale basaama? Tumonaayibi tûng byanza byenu, nansha mwaba kaayi. Apa mene, mmwômò, elaayi byanza muulu. Nudi nwitabuuja anyi? Pacidibo babakungwija apa, nudi nwitabuuja Cyôci eci ne, Yêyê udi umweumwe awu makeelela ne kashidi anyi? Mbantu bûngì kaayi? Tangilaayi numone bambi aba; nwênù baana beetu, Mufundu kawenaku wamba leelu ewu ne, Yêyê udi Mwakwidi Munene udi mwa kuumvwa padi mateketa etu amulenga anyi? Mmwômò anyi? Mbantu bûngì kaayi badi biitabuuja nanku awu, elaayi byanza byenu muulu? Yêyê udi Mwakwidi Munene udi mwa kuumvwa padi mateketa etu amulenga.

¹⁰⁸ Pashiishe piikala Bible wamba ne: “Yêyê udi umweumwe awu makeelela ne kashidi,” mbantu bûngì kaayi badi biitabuuja nanku awu? Nanku ncyenzedi kaayi cidiYe mufwanyine kwenza leelu ewu? Mmufwanyine kwikala mwenzejiibwe bwa kwenzaye muvwaYe mwenze makeelela. Mmwômò anyi? Yêyê udi penyi diloolo edi? Mmusombe ku diboko dya balume dya Udi Mutambe Bunene, mubidi Wende; Nyuma Mwîmpè ngudi mwab'ewu mu nzubu emu, bwa kwenza ne Yêyê amanyike.

¹⁰⁹ Monaayi bîmpè, tangilaayi mpindyewu. Cyakenzeka ncinyi paakalenga muntu kampanda cilâmbâ Cyende kwine kwaka, mukaji kampanda dituku dikwabo? Yêyê awu kavwa ne karta kaa disambila to, mutudi bafwanyine kwamba, kadi wakalenga

cilàmbà Cyende. Nenku paakalengaye cilàmbà Cyende, Yesu wakakudimuka kwamba ne: “WàNdengi awu nganyi?”

¹¹⁰ Ke Peetelo kuMudyula, wamba ne: “Mona’s, Mukalenge, aci kaciyena cyumvwikaku bu cintu cya muntu udi wela meeji to. Mona’s, muntu ne muntu’s udi udyenzeja anu bwa kuKulengaye. Mbwa cinyi kukonka ne: ‘WàNdengi awu nganyi?’”

¹¹¹ Ke Yèyè ne: “Kadi Mémè’s Ngădyŭmvù muteketangane.” Mbantu bŭngì kaayi badi bamanye aci? *Bukole*, cidi cyumwija “dikanda,” bwakapatuka munda Mwende. “Ndi mushaale muteketangane, muntu kampana mmuNdenge ne dindenga dya mushindu mushiilangane.” Ke Yèyè kukudimuka kutuma mèsù pa bateleji too ne paakapetaYe mwaba uvwa kajila aku kaa diitabuujaja.

¹¹² Bantu bônsò bavwa baMwela maboko kunshingu ne: “Eyi Laabi wa yaaya, s’tudi bakwitabuujes,” ne byônsò abi.

¹¹³ Kadi kuvwa muntu kampana uvwa mwitabuujilemu Cyôci aci. Nenku yèyè kulenga cilàmbà Cyende kadi kwitabuujaye ne mmwondopiibwe, bwalu uvwa udyambila munda mwa mwoyi wende ne bu yèyè anu mwa kwenza nanku cyôci aci ncivwa cyenzeka.

¹¹⁴ Yèyè kukudimuka kutuma mèsù pa bateleji too ne paakamupetaYe, ke Yèyè ne . . . kumwambila ne disaama dyende dya muyeeye adi dyakiimana ne yèyè wakondopiibwa. Mmwômò anyi? Mpindyewu, mushindu awu ke wakenzaYe, mu bantu bavwa bateleja.

¹¹⁵ Mpindyewu, ndi ngamba patooke ne Yèyè kî mmufwe to, Udi ne mwoyi leelu anu muvwaYe kwônsò aku. Ne Bible mmwambe, Yesu wakamba, Yèyè mwine ne: “Bu mwakadibi mu matuku a Sodoma, ke mwikalabi mu dilwa dya Mwânà wa muntu.”

¹¹⁶ Tangilaayi mpindyewu, dipà didi naadi Nzambi lwa kuulu eku nansha dyôdi diikale dya mushindu kaayi, bikengela kwikale dikwabo, lwa panshi apu kabidi, bwa kwandamuna ku dyôdi adi. Yèyè wakabwela mu cimenga kampana, mudi Bible mwambe: “Kuvwa bintu byàbŭngì byakapangaYe mwa kwenza bwa bupibya bwabo.” Mmwômò anyi? Cintu cimwecimwe aci leelu. Bikengela nuMwitabuuje. Bikengela anu nuMwitabuuje. Ke mushindu umwepele unudi mwa kwenza.

¹¹⁷ Mulongo wa babeedi wăkŭmbanyi anyi? Mpindyewu, muntu ne muntu ashaale mu kaneemu bwa tusunsa tutwe ku dikumi cyanaana. Ncyèna mumanye ne ngâjikija pa diine dibà adi, nyewu ndi ne bantu batwe ku makumi abidi ne bataanu anyi makumi asatu biimane kuulu mwaba wawa. Kadi mpindyewu, mu mulongo wa babeedi, muntu ne muntu wa kunudi aku mu mulongo wa babeedi udi mumanye ne mêmè ewu ndi mwenyi kunudi, ne ncyèna mumanye kantu nansha kamwe kadi kanutangila to, èlè cyanza muulu. Muntu ne muntu mu mulongo wa babeedi.

118 Mpindyewu munkaci mwa bateeleji mwamwa, muntu yêyê mumanye ne mêmè ncyêna mumanye kantu nansha kamwe pa bidi bimutangila, ela cyanza muulu. Mpindyewu, mpindyewu, cîndi njinga kwamba ncyeci, mulunda wanyi, udi umona's. Mpindyewu, ncyôci eci. Bambi bônso badi kuulu eku pa cibumba cya cyambilu aba. Ne Kilisto ngudi mwenze mulayi ewu. Nudi numona's, wôwò wakafundiibwa. Uvwa ne cya kukumbana dîbâ kaayi? Mu matuku a ndekeelu, anu pabwîpî menemene ne Dilwa dya Mukalenge. Mmwômò anyi? Mmu cikondo aci muvwawu ne cya kukumbana.

119 Mpindyewu, adi ke Diyî didi dyambiibwe mu ciprofeta leelu ewu. Kî mbukênkè bwa Luther to; kî mbukênkè bwa Wesley to; ne kî nnansha bukênkè bwa beena Mpenta to. Mbutungunuke bubande ne njila mpindyewu. Mpindyewu, bwa Luther budi anu bîmpè; bwa ba-Méthodistes budi anu bîmpè; bwa ba-Baptistes budi anu bîmpè; wônso awu, bwa Beena Mpenta, bwîmpè. Kudi baa mishindu yônso ayi basombe mwab'ewu diloolo edi. Kî—kî—kî mbantu bôbò biine to. Ambaayi tûng bu ba . . .

120 Kwênàku mufwanyine kwambila Méthodiste bwa Luther to, bwalu yêyê udi witabuuja dijidiibwa kadi Luther yêyê kayi udiitabuuja to. Nwamonu anyi?

121 Kwakwambilaku mwena Mpenta ne “dijidiibwa ke cyônso cidiku” to, yêyê ukaadi mumone dyalujulula dya mapà. Yêyê kaakwitabuuja aci to. To, yêyê ukaadi mupete bipite aci. Nwamonu anyi? Nenu aci ke cikondo cya ndekeelu citudi bapete, ne Bible udi wamba ne kakwakwikala kabidi bikondo bikwabo bya ekeleeziya to.

122 Kadi kudi ne cya kwenzeka didisanga dya bantu kampanda, nwamonu's, nenu's ke twêtù aba. Mpindyewu, nwavulukaayi, cimanyinu cya ndekeelu. Twêtù aba, tubi bindile mwânà mulaya awu anyi? Elaayi byanza muulu tûng. Nudi nwitabuuja ne nwênù ke Dimiinu dya Abraham ku diikala dyenu munda mwa Kilisto anyi? Elaayi byanza muulu tûng. Nanku, nwênù Dimiinu dya Abraham, akidilaayi cimanyinu cyenu! Kacyena cisanganyiiibwa mwamwa mu Baabulona to, kacyena mwamwa mu bukâmàngumba nansha. Cidi mwab'ewu munkaci mwenu, nwênù badi kanuyi mu cimvundu aci pambelu paapa to. Cîtàbùùjaayee!

123 Muntu mukaji nyêyê ewu, mmwenyi kûndi wa menemene, tudi nende bidimu byâmba kwikala bûngî bwa mwomumwe. Kacya bandela nciitu mwanji kumona mukaji ewu to. Bu mêmè mwa kwondopa mukaji wawa's mvwa mwa kumwondopa, piikalaye usaama. Ncyêna mumanye kantu nansha kamwe pa bidi bimutangila to. Nwâmumònu pèdiye cyanza cyende muulu mu tusunsa tukese emu apu's anyi? Nci—ncitu mwanji kumumonaku to. Yêyê's udi anu muntu mukaji mwimane pende mwaba wawa.

¹²⁴ Leelu ewu bavwa bapweke kuneeku balwe ne cisumbu cya twarta twa masambila, kutucyompakajabo ne kutwabanyina bantu. Muntu kwangata nomba wa kumpala apa, ne nomba wa dikumi paanyima paapa, nomba wa dikumi ne mwitânù, nomba wa mwandamutekete, nomba...anu nanku awu cyanaana. Mbatucyompakaje twônsò, nwênù batangile, dituku dyônsò. Nenku padibo bababiikila, badi bababiikila bônsò mu myaba yônsò. Nwamonu's? Nenku, mpindyewu, kabyena mene bikengela bwa wêwê kwikala ne karta kaa disambila to, somba wêwê anu mwab'awu witabuuje. Mbwa cinyi kwêna mwa . . .

¹²⁵ Dìcintaayi, diloolo edi, nujandule ne mmu dîbà kaayi mutudi ne mwoyi emu. Nwamonu's? Mpindyewu, kabidi, kukaadi anu pabwîpî menemene ne kujikaku, mulunda wanyi. Pabwîpî menemene ne kujikaku!

¹²⁶ Mpindyewu, piikala Nzambi awu wa Abraham mubiishe Yesu Kilisto ku bafwe, ne piikala Yesu pende mulaye ne mu matuku a kundekeelu bimanyinu bimwebimwe abi bivwa Abraham...byakenza Mwanjelo (wa bwena uvwa mwikale Nzambi mu mubidi wa buntu awu) Abraham mutangile, pabwîpî menemene ne mwânà mulaya kufikaye, Yesu mmwambe ne cintu cimwecimwe aci necyenzeke leelu ewu.

¹²⁷ Mpindyewu, tudi tumona bômbè ya mushinda ne mangumba, ne byônsò abi, ne mu cimvundu mudibo basanganyiibwa amu. Tudi tumona Billy Graham lwa mu cibanda mwamwa, ne Oral Roberts, ne bantu bônsò abu lwa pambelu paapa; musanjeela wa cyena Mpenta ne musanjeela wa cyena mangumba lwa mu cibanda mwamwa, tudi tumona byônsò abi biikale bipitakana, biikale byenda ne cimanyinu. Billy Graham, mulongi wa maalu a Nzambi mu tulaasa wa kalàndààmùsèngà, bidi dingumba diitabuuja abi. Oral Roberts, mwondopyanganyi webe wa kalàndààmùsèngà, anu menemene cidi Mpenta . . .

¹²⁸ Kadi tangilaayi mwab'ewu, kudi cintu kampanda cikwabo cidibo balaye Dimiinu dya Abraham. Bôbò nyawu badi mu cibanda mwamwa munkaci mwa mangumba; kudi cintu kampanda *pambelu* paa mangumba cidi ne cya kwenzeka, ciikale cisanga bantu. Netucilekele ciya nanku awu too ne maalaba diloolo.

¹²⁹ Tangilaayi, ncyêna mumanye mukaji wawa to. Nêmmwelè nyima. Mukalenge Nzambi Yêyè mwambile mukaji wawa cintu kampanda, pâmwâpa cidi—cidi mbwalu bwa ku lubanza lwende, pâmwâpa cidi citangila mfranga, pâmwâpa ndisaama; ncyêna mumanye. Yêyè ke wâmanya ne mbulelela anyi to.

¹³⁰ Bu Yêyè mwa kwenza diloolo edi cintu cimwecimwe cyakenzaYe cikondo aci, nenwitabuuje Nzambi awu wâkalayabò kudi Yesu Kilisto bwa ne neikale mwab'ewu mu matuku a kundekeelu anyi? Mbantu bûngì kaayi badi biitabuuja ne tudi ne mwoyi bifwanangane ne mu Sodoma, dîbà didi buloba

bujima bubwele mu ngiikadilu wa Sodoma? Mbantu bûngi kaayi baa kunudi badi biitabuuja ne cîngânwâmbidi diloolo edi eci m'Bulelela? Nanku, nwênù bânà ne Dimiinu dya Abraham, itabuujaayi Nzambi!

¹³¹ Mpindyewu, pa nanku aci necinûmùshè mu mitu yenu bya ne mmêmè udi uteeta mwa kwambila mukaji ewu cintu kampanda, mwikale mumutangile mumpala, anyi necyumushe bintu byônsò bya ne ndibala dya mu meeji a bantu anyi byônsò binudi baswe kumanya abi. Muntu wetu yônsò utu mumanye bya dibala dya mu meeji a bantu ewu's bikengela ikale ne ngeelelu wa meeji mwîmpè mupite awu nanku. Nwamonu anyi? Nwamonu anyi? Nukaadiku bamone kacya mubadi wa mu meeji a bantu uyiisha Evanjeliyo? Nukaadiku bamone kacya mwena lubuku uyiisha Evanjeliyo, wenza bimanyinu ne maalû a kukema, mwikale wambilangana mudi Yesu Kilisto mwikale umweumwe awu? To.

¹³² Nwamonu's, cidi anu...mmeeji adi mu mitu ya bantu. Nwamonu's, mbampofo. Nudi nwiitabuuja ne badi mwa kwikala bampofo anyi? Bible ngudi mwambe ne ke ciikalabo. Mmwômò anyi? "Beena mutu mukole, badibandishi, banangi baa masanka kupita kwikala banangi baa Nzambi, bashipi baa bipungidi, bashiminyinyanganyi baa maalû, kabayi ne kudikanda, badyombodi baa bantu baa maalû mimpè, biikale ne mmwenekelu wa difwana dya Nzambi, kadi babenga kwitaba Bukole bwadi."

¹³³ Yesu kaakambaku, mu Mataayi Munsantu 24.24 ne, nyuma ibidi eyi mu matuku a kundekeelu mmifwanyine kuseeswisha ne Basungula biine, bu byôbi mwa kwenzeka anyi? Kadi kabyena mwa kwenzekaku to. Bôbò bavwa mu meeji a Nzambi ku cibangidilu, ne bôbò biine badi citupa cya Nzambi.

¹³⁴ Mpindyewu, Nzambi wa Abraham, wa Izaka, ne wa Yakobo, anyishaku bimanyiibwe diloolo edi ne cîndi ngamba eci m'Bulelela pa bidi bikutangila Wêwè. Ng'Wêwè, Mukalenge. Anyishaku bwa basadidi Beebe mu didipwekesha dyônsò bakumbane mwa kuumusha meeji abo bôbò mu njila, bwa Wêwè wamona mwa kukwata mudimu ne mibidi yetu bwa Butumbi Bwebe. Mu Dînà dya Yesu, Mwânà wa Nzambi. Amen.

¹³⁵ Dipà ncinyi? Kî ncintu cyûdi wangata ukosa kadi kunyungulula nansha. To, to. Nkumanya kudyumusha wêwè mwine mu njila bwa Nzambi amone mwa kukwata neebe mudimu. Dipà cidi anu kudyumusha wêwè mwine, nenku Nzambi ukwata naaci mudimu.

¹³⁶ Inâbânzà udi paanyima paanyi ewu ufwafwa kayi ujanguluka to yêyè kayi mwondopiibwe. Inâbânzà udi paanyima paanyi ewu mbafume ku dimusambidila kudi muntu mukwabo, anu matuku makese aa. Udi ne kansere. Kansere aku kadi mu dibeele dyende ne mu bisulusulu byende kabidi. Ne mbafume ku dimusambidila anu matuku makese aa, ne udi udyenzeja

bwa kwitaba ciine aci ku diitabuuja bwa ne mmwondopiibwe. Cidi EMU MMUDI MUKALENGE WAMBA! Aci mbulelela anyi, inābānzà? [Inābānzà udi wamba ne: “Eyo, mbulelela menemene.”—Muf.]. Byòbì nanku, nyungisha—nyungisha cyanza cyebe uleeje bateeleji. Nzambi awu wa Abraham uciidi anu ne mwoyi! Mbîmpè, ndaaku witabuuje cyûdi mwitabuuje aci nanku neûmwè bîmpè. Amen.

Nudi nwitabuuja anyi? Nudi nwamba ne: “Kadi bwa bateeleji paabo?”

¹³⁷ Mukaji ewu udi musombe apa ne...wende kundekeelu kwa mulongo ewu, inābānzà mwibîdi mwaba mwine awu. Pāngānyūngulukidi anu lwa mwine mwab’awu ngāmònu cintu kampanda, cintu cijingila ku diboko dyende, lwendu lwa mashi atuuta bu mpompi. Udi ne lwendu lwa mashi aya lubilu lubilu. Mmwômò anyi, inābānzà? Ela cyanza cyebe muulu tūng. Wèwè mwitabuuje, lwendu lwebe lwa mashi alu nelupweke. Nzambi wa Abraham uciidi anu mu cyalu. Yèyè uciidi menemene anu civwaku aci, Dìyì dya Nzambi bwa dituku edi!

¹³⁸ Wetwawu! Mpindyewu udi witabuuja? Ikala ne diitabuuja kudi Nzambi! Bivwa byenze anu bu ne mmwānà’s. Nzambi ngudi mumanye mwoyi webe, wèwè nsongakaji, kî mmèmè to. Udi witabuuja ne Nzambi mmukumbane kunsokolwela cidi citacisha aci? NeuMwitabuuje bu mèmè mwa kwenza nanku anyi? Kî mbwebe wèwè to, mbwa muntu mukwabo, mmwaneenu wa balume. Ne yèyè mwine udi usaama bikole be mwikale mu cimenga cya ku nord eku, mu Tulare. Udi mu lupitaadi, mwikale ne kansere kaa mu mashi, ne bangangabuka biine mbamulekele bwa adifwile. Kakwenaku ditekemena nansha dikese to. Mmwômò. Udi witabuuja anyi? [Nsongakaji, mu mwadi mukole, udi wamba ne: “Eyowa.”—Muf.]. Mbîmpè. Cyûdi naaci mu cyanza cyebe amu ncinyi? Angata cyôci aci ukamutenteketele pambidi. Kadi kwedi mpata nansha. Itabuuja! Amen.

¹³⁹ Nudi nwitabuuja anyi? Ncitu mwanji kumonaku nsongakaji ewu to kacya bandela. Kadi Nzambi udi ushaala anu Nzambi! Mpindyewu, ngambilaayaaku muntu wetu wa maci ne mèsù ewu udi mwa kwenza ciine aci? Kabyena mu bukookeshi bwa muntu wetu wa maci ne mèsù ewu bwa kwenza cyôci aci nansha. N’Nzambi awu wâkalayabò kudi Yesu Kilisto ne neikale mwab’ewu mu matuku a kundekeelu ne neadishindike Yèyè mwine (Dimiinu dya Abraham didimwene ne aadi abidi) bu mwakadibi mu matuku a Sodoma.

¹⁴⁰ Mpindyewu apa, ncyêna mumanye inābānzà ewu to, mèmè ne yèyè katwena bamanyangane to, ngela meeki ne ewu ngwetu musangu wa nzānzānzā wa kutwilangana kacya baatulela. Udi witabuuja ne mèmè ndi musadidi Wende anyi? [Inābānzà awu udi wamba ne: “Eyo.”—Muf.] Udi witabuuja ne eci ke Dìyì anyi? [“Eyo.”] Ne udi mumanye ne bu...Dìyì edi dicitu anu

dijingulula meeji ne mapangadika a mu mwoyi. Mmwômò anyi? [“Mmwômò.”] Kabidi, Dîyi ditu Mwondopi, bu wêwè mwa kuDiitabuuja. Udi witabuuja. Kabidi, udi ne mundidimbi kampanda mukubwikile, mundidimbi mufiike. Nkansere. Nenku udi witabuuja ne Nzambi udi mwa kungambila mwaba udi kansere aku kasanganyibwa anyi? Kadi mu mala a munda, bu mudi ngangabuka wamba. Udi mpindyewu witabuuja ne newondopiibwe anyi? [“Amen.”] Ndaaku, ne kwediku mpata nansha mikese to, nenku Nzambi neakwondope. Amen.

141 Nwênù bônso, nudi nwitabuuja anyi? Anu cyakalayaYe menemene bwa kwenza! Ikalaayi ne diitabuuja kudi Nzambi, kanwedi mpata nansha.

142 Wêwè ne mêmè katwena bamanyangane nansha. Mêmè ncyèna mukumanye to. Piikalabi ne katwena bamanyangane, bateeleji bamanye cyôci aci, twèlè byanza byetu muulu. Ncitu mwanji kumona mukaji ewu to kacya bandela.

143 Nwênù kwaka nudi nwitabuuja anyi? Nudi nwitabuuja ne n’Yesu Kilisto anyi? Ncinyi ciine eci? N’Dîyi Dyende. Padi bantu aba baDibenga apa, kabeena babenga muntu to, badi babenga Dîyi. Dîyi ndivwa disanganyibwa pambelu, kadiyi mwa kwalukila munda nansha.

144 Mpindyewu, inâbànza ewu mmwenyi kûndi. Ncitu mwanji kumumonaku to kacya bandela. Nzambi ngudi Mwondopi. Mbifwanyine kwikala kabiyi bwa dyondopa to, mbifwanyine kwikala bwa cîngà cintu, kadi bu Nzambi mwa kungumvwija cidid lutatu lwebe, neungitabuuje anyi? Cintu cya kumpala cyûdi ukebela bwa bakusambidile ncyôci eci, udi ne dici dipate. Dimwe dya ku maci ebe, kwèna mwa kuumvwa naadi to. Mmwômò. Ncyà bushuwa. Ne pashiishe wêwè udi ne cilele kampanda, ne udi ukeba bwa ulekele cilele aci, ncyà kunwa kwa mfwanka. Ela munu mu dici dyebe didi dyumvwa adi mpindyewu, eyo, dici dyebe didi dyumvwa adi. Eyo. Itabuuja Nzambi mpindyewu ne kwata njila ndaaku, ne kwikadi. . . nenku kwadyakunwa kabidi mfwanka to bu wêwè mwa kwitabuuja. Ndaaku, nenku Nzambi akubeneshe.

Nudi bamone cyènzèkì aci. Yêyè kî mmulelela anyi?

145 Ncyèna mukumanye nansha, mêmè ne wêwè katwena bamanyangane to. Mêmè ncitu mwanji kukumonaku to kacya bandela, kadi Nzambi ngudi mukumanye. Bu Nzambi mwa kungambila cintu kampanda cidid cikutangila, newitabuuje anyi?

146 Bateeleji bônso nebiitabuuje anyi? Kudiku muntu kampanda kunudi aku mumanye mukaji ewu anyi? Kudiku muntu kampanda munkaci mwa bateeleji emu mumanye mukaji ewu anyi? Eyo, nudi bamanye ne eci ncilelela anyi to. Eci’s ke cidid mwa kukosa bwalu. Eci ke cidid ne cya kwamba bulelelela.

¹⁴⁷ Mpindyewu nudi mwa kumona cyènzèkì anu munda mwa tusunsa tukese cyanaana etu. Nwamonu anyi? Cidi anu... Nkaadi ntetuka. Nwamonu anyi? Bintu byònsò bikaadi nciciyi mbimona to. Nwamonu's, n'Dijingulula adi. Nwamonu's, Cyôci aci ke Nyuma Mwîmpè awu. Kî mmèmè to. N'Diyi dilaya bwa dituku edi. Kacituku cyanji kwenzeka to kubangila ku matuku a bapostolo, kacitu cyanji kwenzekaku nansha. Kadi mwaba wakambabo ne: "Pabwîpi menemene ne dilwa dya Mwânà wa muntu. Bu mwakadibi mu matuku a Lota, ke mwikalabi mu dilwa dya Mwânà wa muntu." Beena bupidya kabeena biitabuuja Cyôci aci nansha. Kabeena ne cya kwitabuuja Cyôci aci to. Kadi beena kwitabuuja badi biitabuuja Cyôci aci!

¹⁴⁸ Mpindyewu, bu Nyuma Mwîmpè mwa kusokolola cyôci eci, mbantu bûngi kaayi biitabuuja ne mwoyi wabo wònsò, elaayi byanza byenu muulu.

¹⁴⁹ Wèwè udi mupete lutatu kampanda. Udi mupete njiwu ya mashinyi, bishiye amwe a ku manungu ebe a ku nshingu mateketangane. Udi kabidi mushaale ne koonyi kalembelele. Kî mmwômò anyi? [Mukaji awu udi wamba ne: "Eyowa's, mukalenge."—Muf.] Udi witabuuja? ["Eyowa's, mukalenge."] Neúmvwè bîmpè. Tumbisha Mukalenge.

¹⁵⁰ Udi witabuuja ne Nzambi utu wondopa disaama dya twonyi anyi? Nanku ndaaku utungunuke ne diitabuuja dyondopa dyebe.

¹⁵¹ Lwâku, inăbànzà. Tangila elu luseke. Udi witabuuja ne Nzambi utu wondopa disaama dya mwoyi? Eyo, kwata njila ndaaku witabuuje, nenku mwoyi webe newúmvwè bîmpè.

¹⁵² Vwila apa. Udi witabuuja ne Nzambi udi mwa kwondopa nyima webe awu, ukusangaja anyi? Nanku ndaaku witabuuje.

Itabuujaayi anu Nzambi cyanaana, ke cyònsò cinudi ne cya kwenza!

¹⁵³ Lwâku, inăbànzà. Udi witabuuja ne Nzambi utu wondopa disaama dya cifu? Ndaaku, udye didya dyebe dya diloolo, witabuuje ne mwoyi webe wònsò.

¹⁵⁴ Lwâku. Udi witabuuja ne Nzambi utu mwa kwondopa manungu asaama anyi? Nanku ndaaku, itabuuja, nenku wènzè. . .nenku Nzambi neakusangaje.

¹⁵⁵ Eyo, lwâku. Udi witabuuja ne mwoyi webe wònsò anyi? Udi witabuuja anyi? Disaama dya manungu, cyakabidi. Udi witabuuja ne Nzambi udi mwa kukusangaja anyi? Ndaaku, itabuuja Cyôci aci, wamba ne: "Twasakidila, Mukalenge."

Mbantu bûngi kaayi badi biitabuuja kunudi aku? Nudi nwitabuuja anyi?

¹⁵⁶ Inăbànzà udi musombe mwab'ewu ewu muvwale nkanzu mukunze, udi mwele cyanza muulu mwab'ewu ewu, mwikale usaama lwendu lwa mashi aya lubilu lubilu. Udi witabuuja ne Nzambi udi mwa kukusangaja anyi? Udi witabuuja? Mbîmpè.

Tentekela inăbànzà udi ku luseke lwebe lwa kwinsi aku awu byanza, umwambile ne dîyi dyende nedijikuke bîmpè menemene. Amen.

Ke bwalu abu's. Amen. Nudi nwitabuuja anyi? Ikalaayi ne diitabuuja!

¹⁵⁷ Muntu mulume nyêyê ewu musombe mwab'ewu, udi ne disaama dya mashi alwa munda. Udi witabuuja anyi, mukalenge, wêwê udi musombe mwab'ewu ewu? Eyowa, udi ne disaama dya mashi alwa munda. Udi witabuuja ne nediyondopiibwe anyi?

¹⁵⁸ Inăbànzà udi ku luseke lwebe awu udi pende ne disaama dya mashi alwa munda, udi kabidi ne disaama dya nyima. Udi witabuuja ne Nzambi neakwondope anyi? Udi witabuuja? Ela cyanza cyebe muulu witabuuje cyôci aci. Itabuuja.

¹⁵⁹ Inăbànzà udi ku luseke lwebe awu udi usaama mikolo ne cifuka. Udi witabuuja ne mmwômò anyi, wêwê inăbànzà? Udi witabuuja ne newondopiibwe anyi? Ee, ela cyanza cyebe muulu, wamba ne: "Ndi ngitaba nanku."

¹⁶⁰ Mbîmpè, inăbànzà udi ku luseke lwende awu udi ne disaama dya kîshî. Udi witabuuja ne Nzambi neondope disaama dya kîshî anyi, wêwê nsongakaji udi muvwale binete wawa? Ela cyanza cyebe muulu, wamba ne: "Ndi ngitaba nanku." Eyo, itabuuja nanku.

¹⁶¹ Inăbànzà udi ku luseke lwende awu udi ne disaama dya twonyi. Udi witabuuja ne Nzambi neondope disaama dya twonyi anyi, wêwê inăbànzà? Eyo, ela cyanza muulu, itaba nanku.

¹⁶² Kânà kaa bakaji katekete kadi ku luseke lwende aku kadi ne cibodibodi. Udi witabuuja ne Nzambi neondope cibodibodi aci anyi? Ela cyanza muulu, itaba nanku.

¹⁶³ Mbantu bûngî kaayi badi biitabuuja ne mwoyi wabo wônsò? Nanku juukilaayi kuulu nwitabe nanku. Juukilaayi kuulu mu Bwikadi bwa Nzambi wa Abraham, wa Izaka, ne wa Yakobo.

¹⁶⁴ Mu Dînà dya Mukalenge Yesu Kilisto Nyuma Mwîmpè anyisheku amate mpindyewu mu nzubu ewu ne ondope muntu ne muntu mu Bwikadi bwa Nzambi!



NZAMBÌ KE MUDYÜMVWIJIDI WA YÉYÈ MWINÈ LUA64-0205

(God Is His Own Interpreter)

Diyiisha edi dya Mwaneetu William Marrion Branham, dyakayiishiibwa mu diisâtù diloolo, dya 5 wa ngondo mwibîdi, 1964, ku Kern County Fairgrounds mu Bakersfield, Californie, U.S.A., ndyumusha pa mukaba wa mêyi ne dittuta ku cyamu mu kaabujima kaadi mu Anglais. Nkudimwinu wa mu Ciluba ewu mmutuuta ku cyamu ne mwabanya kudi Voice Of God Recordings.

CILUBA

©2015 VGR, ALL RIGHTS RESERVED

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org

Dîyi dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org